

光緒山西通志

仕實錄四

錄五之四

山西通志弟百四十八

賜進士出身頭品頂戴兵部侍郎兼都察院右副都御史巡撫山西提督軍務張勳奉旨監修

元明

馮恩陽曲人通經籍敦行誼蒞官廉明善理冤抑累官御史中丞集賢院大學士其宗人馮純者舉進士爲河南行省平章追封魏國公子思溫彰德路總管封晉國公行事不詳

郭周尙嵐人官義勇軍萬戶遇歲饑發廩賑貸多所全活超授本州防禦使賜金牌充宣差提控再進鎮國上將軍鎮遠節度使兼嵐州管內觀察使河東北路關外六十都元帥懸帶虎頭金牌便宜行事卒於官

杜克溫太谷人上都巡警院使有沒入男女奏許令配偶有

古杜母之謫歷官銅鐵冶提舉使

武簡如太谷人性寬厚任大理評事議獄多仁恕終開州刺

史

以上太原府

靳和曲沃人漢汾陽侯彊之後喜周貧乏導人以善金末國
結鄉勇爲保障歸元太宗錫以金符官鎮南大元帥從破河
南授絳州軍民長官

南裕洪洞人西域叛議討平之命裕爲征西大元帥裕素負
將略驍勇絕人出奇制勝師所向克捷西域以甯後奕葉蕃
盛邑稱巨閥

王泰亨平陽人成宗時給事東宮歷太子賓客累遷中書平
章致仕封晉國公諡清憲所著有康莊文集

續執中襄陵人進士第大德初任絳州儒學教授勤於教誨

人才輩出後徵爲國子助教

許天麟曲沃人金進士琇孫也歷河津尹黜奸去苛遷堅州同知有循聲

張天生翼城人任河南尹除寇害濟民困百姓多賴全活子伯成亦令河南蝗不入境民立碑頌之以上平陽府

龔居敬字太簡河中人累官雲南行省參知政事積學勵行家蓄書二萬餘卷卒贈陝西行省參知政事封河東郡公諡

憲懿蕭剡爲作神道碑祀鄉賢

蒲州府

李公弼潞州人沈毅多大略以武功累官定遠將軍同知沁州節度使

高麟上黨人父守中元初爲千戶從攻黃州歿麟初備宿衛累官工部侍郎世祖北幸丞相阿合馬留守大都專權貪恣

千戶王著等謀殺之觸馳驛以聞後遷河南等路宣慰使
楊仁風襄垣人父閏金末同知沁南節度守銅鞮令城陷死
之仁風幼聰敏能文至元中裕宗爲皇太子以宋衛薦辟東
官僚備顧問歷懷邢洛三治中有善政累遷遼陽參知政事
以中書左丞致仕卒

李執中襄垣人登進士至願間累立豐功官至禮部尙書
權執中至願間同知汴梁路均州事文學政事爲時所稱
連肇襄垣人博學有文章至元間舉進士歷潞城陵川汾州
教官爲阿都溫太尉府參軍又爲山東道考試貢舉官卒贈
集賢院學士以文章名

王守忠潞州人少卓犖不羈通律學至大間授隰州判官佐
政有方延祐初調尹岳陽遷闕鄉歷江州路判官絳州知州

靳繼昌潞州人官滁州知州晉甯路同知致仕有政聲

張和潞州人由儒士除青州路經歷升陝西行省左司郎中
在官廉能

張時髦壺關人進士授吉州判官升本縣尹充河南江北等
處行中書省儒學提舉終祕書監丞資性深純文章瞻雅

馮繩武壺關人祖以吏業顯名及繩武儒吏兼通累遷吏部
郎中以臨事明敏拜監察御史歷官江南浙江道廉訪副使
同知上都留守司事

王汝礪字蓋臣爲隴右廉訪掾有政聲授江西湖廣道廉訪
知事

王梅字鼎臣守忠從孫由端本堂說書除甯紹宣撫照磨轉
行臺御史中書左司郎中禮部侍郎改河東宣撫同知守太

行隘口保鄉土還爲樞密副使

以上諸安府

杜豐字唐臣西河人倜儻有大志通兵法仕金爲平遙義軍謀克入元授兵馬都提控累功遷河東兵馬都元帥後爲沁州長官勸課農桑寬徭薄賦民以富庶境內肅然沁人立祠祀焉封沁陽公子孫遂家於沁

李佺汾州西河人金末寇亂佺集鄉人保禦已卯歲太祖之妹曰曳刺海號監國公主遣行省不華收地河東公主承制授佺汾州左監軍尋擢先帥從擊平陽河中及京兆鳳翔涇邠諸州累功授征西千戶隨征西路大都督達海伐蜀入散關收南鄭遂取西川卒于鼎鑊千戶征緜漢嘉定有戰功燦中己亥進士士貞襲兄鼎鑊平定閩州及馬湖之寇深入思播擊重慶奪其戰艦從定遂州眉州嘉定合州卻敵禽將屢

建功勳

梁秉鈞字仲平平遙人性寬厚純粹鄉黨稱之仕至大理評事子七瑜玫瑛珪瓊琮

梁瑜性純厚體貌魁梧年二十四爲平遙尹寬仁有容吏民懷之卒於官

袁湘字潤夫臨縣人累功任延安路兵馬都總管大元帥親勸耕稼裁抑浮濫使各食其力隣境聞之咸願歸附屢建言軍民利病上嘉納子克忠四川道提刑按察使克良提舉太原探木司

鄭允中石樓人初爲浙東廉訪使累官冢宰德被生民功施社稷封魏國公

王仲文介休人由才能至正中授光州判官尋改總管府判

官終於中書省門下省丞相

李邦用介休人少有大志不泥俗學孝弟出於天性後登進士居官教人以孝弟爲先時望歸之

王珪介休人至正間碗子城討賊有功升部兵元帥後曹濮賊亂又討平之升都督大元帥以上汾州府

鄭濤陽城人官河東宣慰司同知鎮澤州輕賦回國民賴以安澤州府

關關出唐兀氏世祖時擢大同路廣勝庫達嚕噶齊廣勝貯兵器時總管唐兀海牙以庫作公署置甲仗於虛廩多被蟲鼠害關關出言於上復之使者薛綽不花納速魯丁檄取膠房軍衣甲弓矢關關出責其入文書領去時憲副速魯蠻令毋入文書且命有司封鑰其庫將黠視之關關出不從事聞

命管越魯蠻罷之大德元年升大同路武州達魯噶齊

韓浩大同人任便宜都元帥兼應州彰國軍節度使撫愛軍民具有方略

張守中廣靈人任元帥屢戡勁敵

孫公亮父威以製甲累官都總管公亮少有大志練習國典承父蔭佩銀符上章請設御史臺以正紀綱遂拜監察御史職滿憲長奏公亮供職無私可再任裨矜式後進累遷至行工部尚書

高定渾源人好學敦信尚氣節仕爲雲中招討使都元帥承安軍節度使定謂諸子曰吾蒙國恩致位侯伯布衣之極曷敢久貪爵寵乎遂致仕去

安明本山陰人初爲千夫長戍堅州韓元帥浩薦明本特異

授以忠州都統賜銀符使招誘殘民歸田里後遷平陽元帥
百姓惜其去攀號留之復召還忠州以慰百姓

忽蘭大同人世襲大同路達魯噶齊經七世贈推忠靖運開
府儀同三司上柱國金紫光祿大夫太師甯王

杜唐卿大同人曾爲浙江行省參政德學高古

李伯述應州人爲河南省左丞卒於兵追封魏國公諡忠愍

張文顯懷仁人至正間累官吏部尙書清正有守

曹子明懷仁人上都縣尹公正敢爲惟義是守以上大同府

呂允平定人宗禮五世孫性剛介初仕燕南按察司奏差有

正定籍兵賄主吏以避征戍允廉實正以法臺臣以聞官僚

率增秩允顧不與或勸其自陳允不從後陳言切中時弊遷

漢中道肅政廉訪司僉事致仕詔拜平定州事以子思誠貴

封齊國公

張文孟人父士宛延祐二年進士授徽州同知文亦延祐中進士授元氏尉勸民力田累官海南道廉訪使子光孝至元進士知賓州能窮治姦貪光孝子聚聚子知名皆至治進士知名累官青州知府盜賊屏跡知名子起元登進士授平原令以孝友稱賊過相戒不入子季秀俱登鄉進士秀授施州司理民有爭訟片言決之性剛直時有冤獄力辨於朝爲執政沮落職

宋超平定人有學行旁通醫術仕終集賢大學士仁宗勅翰林學士程鉅夫爲撰碑

以上平定州

李得義忻州人幼有膽智長善騎射曉方略從軍取蜀屢建奇勛以武功贈中翊校尉

李子敬定襄人幼業儒長習武事善騎射至元間從軍平蠻官至軍民鎮撫贈武略將軍

王居敬忙兀荅兒季子嘗侍春宮以勞授太原路總管府治

中

以上忻州

楊友字彥誠宋將業之後也家雁門少奇邁不羈金末元兵至率鄉人歸命累立戰功擢行營都統時堅代二州荒殘城池頽毀友復立之授元帥左監軍兼堅代永定軍節度同知招集流亡保州東之留屬屯墾以佐軍需南山賊起州復陷友率百餘騎設伏斷其歸路賊至奮擊大破之斬首數千級餘黨遠遁以功就遷節度使左領軍行元帥乃大築州城凡公府庭館臺榭寺觀營造一新至元中卒弟山字彥林嘗佐軍謀官總領軍民都提控

趙祥字天麟繁時人金末徙冀州又徙蔡州之平輿天興癸巳金主奔蔡州祥倡義兵數千爲帥元師圍蔡急率所部出發平輿富人藏粟突圍饋諸城金主嘉勞賜銀符命還守平輿明年金亡以其眾歸宋宋襄陽帥某慮降人爲變謀阬之太尉江海不可言於帥使戍鄧州而別遣將呼延實爲之監祥與實不相善又知帥始謀益憤會元兵略地漢上因鼓眾突入實營執以出盟令約束所部毋輒動卽開門納元師而縱實及宋軍盡歸襄陽以謝帥時太宗七年乙未冬也丙申二月皇子出南征徙唐鄧均三州之民於雒陽西以長水爲鄧治令祥權宜行省事明年襄樊二州亦繼徙至祥入覲奏雒西歲饑請發大名軍儲米運陝州鹽以濟報可特賜金符錦衣旋授鄧州長官以其弟彥爲州將在雒西十二年先

勞分苦勦棘墾萊府寺田廬一時並治癸丑世祖以太弟當國丞相史天澤奉命經略河南屯田漢上乃徙五州民復故土祥仍為鄧帥是時宋已築襄樊均鎮以重兵其民雖並徙而無所歸皆倚鄧為固祥外戰內耕四年之中積穀七十餘萬石以疾乞休不報卒年六十一祥善射多力性坦直既以徒步秉鉞垂節有地方數百里而常布衣麤冠敝鞍與將佐言公府則吾節度牧不可不嚴名分之守私處則汝輩皆少時所從起相習者豈可遽改平日度也必齒坐序飲其簡略與人不疑若此子侃以平宋功授昭勇大將軍鎮衢州

劉懷玉堅州人元帥會孫也父澤管民長官懷玉幼聰敏風彩英俊嘗襲父職政平訟理吏民愛帶至元二年遷知代州歷孟管隰三州知州所在並有能名

王克義崞縣人幼好學至正初由國子生授平準職轉定襄縣尹旬月而治常騎驢往來其家人至今稱之

以上代州

狄元昌保德人宋樞密武襄公青後弟元勝元德元祿俱以人才選授提領十二郡管郭等諸驛傳元昌善騎射多藝能鄉里有窘追求之者指國貨施臨終取券焚之曰吾身後不可令子孫徵負於人累官兵部侍郎天水郡伯子八孫十二

皆貴顯

保德州

孔錦山字晉望絳州人雄勇多智略善騎射初襲父爵千夫長從征累有功戰於茶山墜馬騰上者三世祖賜錦衣弓矢鞍勒累遷礪門等處鎮守萬戶子圖魯布有父風次額森布哈俱礪門等處副千戶佩虎符

史遷河津人初封鎮西元帥後入朝爲相子三承慶承宗俱

爲令教民開水利植椒樹功德載蛟龍碑記用禮管河不病民亦不病國江南人圖像祀之

劉慶河津人從國兵征鳳翔下河中遇里人陷爲奴者贖之並釋所俘軍民因董正鄉甯營屯兼領縣事歷七載民稱便改河津丞遷知吉州時徵發紛繁不忍民受其累有惠政以起瘡痍從軍臨民歷四十年才猷卓著

段輔字惟德稷山人奎章學士與虞集馬祖常等並兼經筵官尋遷吏部尙書出爲湖廣等處參政陝西諸道行臺侍御

史

李思敬字君讓仕至肅政廉訪使以孝廉稱子僕有文學授榆社縣尹後至肅政廉訪副使僕子士林亦貴時名其里曰登瀛

張鳴鶴絳州人方正篤學登進士第授晉甯路縣尹蒞政嚴明吏民畏懷仕至工部司丞

王晉卿垣曲人官金牌元帥守孟津立大功

以上絳州

劉佐隰州人至元中宣授承直郎充太原路織染局提舉明年改知本州事器宇寬洪輕財樂施

李榮祖霍州人業儒有大志及爲吏仁慈愛下長於剖決所在頌之升總管以都轉運鹽使司同知致仕孫智有祖風仕

至晉甯路總管

以上隰霍二州

右元六十五人

又四人附見

楊憲字希武陽曲人少從父官江南遂家焉太祖克集慶憲進謁與語悅之留居幕府嘗使張士誠被留踰年還除博士諮議擢江南行省都事軍國事文案填委憲裁決如流上益

親信久之出爲浙東行省郎中復往諭方國珍國珍來附饒
州降命偕理問穆燮總理軍務張定邊陷城憲走還尋進按
察使遷中書省參議又出爲江西行省參政召爲司農卿浙
西田賦畝加二倍額遂定旋參政中書省洪武元年冬改御
史中丞上愛憲方欲相之而憲數短李善長胡惟庸語善長
曰憲爲相我輩淮人不得爲大官矣由是兩人深忌憲明年
出爲山西參政秋召爲中書右丞三年遷左丞憲姜姿容有
才辯能逆知上意又熟典故謂人莫己若多紛更省中事罷
舊吏徧置所私構誅參知政事張景熾御史劉炳等劾罷丞
相汪廣洋徙之海南又教炳劾刑部侍郎左安禮等八人善
長劾憲排陷大臣初皇太子嘗召憲憲不卽至至是窮竟其
罪辟之初憲與劉基善上欲相憲基力言不可上怪之基曰

憲有相才無相器夫宰相者持心如水以義理爲權衡而已無與者也憲則不然

范斌榆次人永樂甲午舉人知華州性仁恕撫字得宜不畏強禦後以憂去民赴闕保留加參議俸復知華州卒於官

李融岢嵐州人生時止一血胞以爲怪棄之融外祖曰此遺胞生多貴剖之果得男宣德壬子舉人清節自勵官至貴州參議未嘗增益田產後裔文學相繼不絕

黃體陽曲人正統間爲新城縣丞持正愛民有田爲水所沒不堪耕種者奏請除租民受其惠

韓彰陽曲人景泰庚午舉人任池陽推官復補延安左遷山東布政司理問歷官清白歸僅攜所歷俸資歲祿捐賑族黨時論多之

孫榮榆次人博學工詩貧不能具餽粥處之裕如景泰癸酉
舉人授華州訓導尋遷麟遊教諭恆以祿不逮親爲歉終身
不御酒內居官時凡四陳時政得失疏累萬餘言幾蹈禍不
悔

張頤字養正其先江都人占籍太原衛天順四年進士翰林
院庶吉士累遷都察院右僉都御史巡撫宣府時太監汪直
北征頤以軍功轉左尋升工部右侍郎成化癸卯致仕宏治
間卒頤有才氣平居持論侃侃而頗急功名士論惜之

王瑞陽曲人成化戊子舉人知丹陽丁父憂改獻縣任丹陽
時有權勢豪橫置於法抵死獻縣有外戚奪民田以計還之
豪右斂迹

張梯岢嵐人成化間貢知陝西中部縣嚴慈互濟任九載終

始如一歲大歉人相食賑救有方盜賊屏息升甯州知州民皆號泣不忍去

張璣文水人成化間舉人知洛南縣廉恕公勤愛民如子秩滿百姓赴京保留加六品俸仍知縣事聲名甲於關西後貧不能歸里卽邑居焉

金鼎字大器榆次人篤實寬裕喜怒不見於色任道力行常若不及成化間貢任武功訓導義貌偉容博學善教以義理約束諸生諸生毋敢違者

羅賢字大用清源人宏治庚戌進士試福建道御史踰年當實受聞親訃卽日就道服闋補原官巡茶陝西時茶禁久弛官茶壅滯不行疏其宿弊酌爲經久計又條上便宜十事按遼東治將帥之貪殘者不少貸一年內封事五十餘上再按

河南值鄉試得人稱盛屬吏貪婪者按實視職中州人以聞
羅稱之

寇儉字約之號裕菴榆次人年二十始就學博極羣書雖盛
暑夜分不寐宏治丙辰進士授大理寺評事陟寺副駁覈多
所平反丁內艱跣行奔葬寢食並廢憂勞成疾卒

常泰徐溝人性聰敏十歲能文性至孝父病嘗糞甘苦正德
庚午舉人辛未進士授行人升戶科給事中上務實治三事
悉嘉納焉

張四維陽曲人正德丙子舉人在平知縣邑當衝疲民逃亡
過半招撫流移均鄰邑館陶地糧著均田圖宿弊盡祛升彰
德府同知裁抑強宗革除冗費百姓立碑思之

彭希曾陽曲人領正德己卯解額授開封通判歷署長葛及

鄢陵在長葛則修學宮執經問難函席恆滿在鄢陵則平土寇文事武備震耀一時考第一進開封同知

李春芳字元實陽曲人正德辛巳進士授盩厔知縣資性明爽值荒歲勸富貸貧凡所營度計及長久行取兵科給事中遷順德知府

胡體乾交城人正德辛巳進士授貴州道御史巡按山東陝西南直累遷浙江副使終河南左布政宦遊二十年絕賄賂遠權勢不置田宅致政歸與親友詩酒爲樂屢薦不起

楊永清陽曲人正德間知隴西縣澹泊有守遇事理解悉中肯蔡興學校繕城池嚴保甲息盜賊期年之間政事畢舉魏朝宗字統元岢嵐人由貢授彰德幕府有廉幹名進知清澗凡有利於民者悉殫力致之

王繼夏岢嵐人萬厯癸酉舉人授甯遠知縣邑當通衢供役擾攘而地多磽瘠水漲陂汙一值荒歲無復生計民胥疲於賦役繼夏乃捐冗贖禁苛取平均驛置之序勸農力耕覈社倉教積貯墾荒萊招流亡因山就澤聽自利不爲禁庾藁咸以充盈於是舉鄉約申六訓延見諸生考德問業鼓鐘間作聲詩繼之諷諭不輟又增築障堞鑿渠引水後世利之

王宗賢字淑顏清源人萬厯戊戌進士授成都府推官精心獄決獄多平反升戶部主事監督南新倉耗蠹一清節剩以萬計改吏部主事轉考功司郎中典試中州得士爲盛當京察時門戶角立宗賢獨持平尤陰護善類升參知分巡鳳平道地方賴以綏靖時督院劉重其才借閱塞上凡綜覈稽查皆倚辦焉以勞卒於官

閻世科太原人性醇雅好學萬厯甲辰進士初任湖州府推官清滯獄數百又疑獄數十起悉決之歲大禳捐俸爲倡賑之升戶部主事督遼儲平收放捐公費千五百餘金助餉查營伍虛耗積銀三萬餘兩報部奉命備兵甯化值兵變置八月幼子單騎出關謹斥埃繕甲兵嚴偵探卒獲安全

程謙字六吉岢嵐人萬厯乙卯舉人崇禎間知西鄉縣勤敏廉肅吏胥畏法署泮縣城固值流賊始起都邑悉遭蹂躪謙獨設法督民守禦三邑俱安堵無虞父老咸稱召杜

姚一麟陽曲人萬厯乙卯舉人授中部知縣值崇禎初饑饉頻仍賊踞城內兵圍城外廬舍灰燼民僅子遺一麟極意軫恤撫殘黎復縣治漸有甦機嚴明果斷吏無訛法民獲甯宇
厯升漢中知府

成材清源人萬厯間貢知宜川饑饉枕籍賊盜內訌材恩威兼用撫綏饑民折衝外寇城賴以保全

以上太原府

祝信襄陵人性醇謹事親備極孝養每聞職官經其閭雖寢必披衣拱立洪武中貢授金華判有清節遷太僕少卿

李信淨山人起家縣掾洪武中用薦擢顯厯吏部侍郎拜尙書六部初屬中書省權輕仰承丞相意指自元年滕毅始位尙書厯陳修詹同吳琳趙好德稱賢然亦無大建豎至十三年中書省革部權乃專銓衡爲尤要願得久其位者寡余煥以排宋訥誅翟善貶杜澤未數月罷惟信厯少宰冢宰幾二載令入覲官各舉所知定內外封贈蔭敘之典後遂垂爲一代令甲上甚委任之以勞勩卒於官

戴麟字仲仁翼城人永樂庚子舉人授莘縣知縣有惠政考

績當遷而淡於仕進致仕歸民爲立祠

李信臨汾人永樂時由國子生授遵化知縣至宣德中閱二十七年始擢無爲知州以年老不欲赴遂乞歸卒

陳紀臨汾人正統戊午舉人歷官許州知州以德化民勸以治生之道察民間夜有讀書及紡績聲給油助之雖隸卒亦各謀以生業一時鄉市絕少遊惰民有輕俠無賴者給與牛絹令其改過由是感化稱循吏焉

段讓洪洞人天順己卯舉人任獲嘉華亭二學教諭分校江西陝西鄉試升高陵知縣時關中大饑盜賊蜂起讓獲輒寘之法邑賴以安

李杲洪洞人成化乙酉舉人幼聰敏博洽羣書任臨洮府同知殫心體國政多惠愛頌聲載途旣去民建祠祀之初管蘭

州倉場民歌之曰官攢無鼠偷監收得李侯收支不留難軍
民兩下安草場失火民懼梟得罪爭爲償納之其得人心如
此

王錫洪洞人成化甲午舉人任醴泉知縣縣人素不精農圃
錫訓以播種之術民皆效之爲立生祠祀焉

馬鸞太平人成化甲辰進士授行人司選江西道御史差陝
西清戍時典兵者驕不順法鸞劾之升山東按察司僉事海
防兵備豪強斂迹百姓安堵子聰字舜達由舉人知長垣縣
有政績遷知鄧州民立碑志之歷宗人府經歷纂修玉牒終
臨洮知府

張天祿洪洞人成化中貢任山東嶧縣知縣丁內艱嶧人乞
留不許後除唐山縣鑿堯山引水灌田重修廟學未老乞歸

唐民遮道送焉

劉榮洪洞人成化中以例貢官兵馬司指揮升岳州府通判復除慶陽府督糧甯夏沈毅剛方暮夜有餽者卻不受簡兵禦寇湖湘底甯儲餉有餘緡義不苟取比歸訓子以義方甲科接武多侈談焉

周義翼城人宏治壬子舉人授東安知縣遷葭州知州性孤潔居官清白自守沒後家益落子孫凍餒十年不克舉葬事邑令郡桂枝卜宅兆厝之製文祭焉郡故葭州部民也

南全洪洞人宏治甲子舉人聰慧勤學博洽經史初授嘉興推官清直不撓多所平反升南京四川道御史論劾不避權貴稱鐵面御史卒於官

仇祿字君錫曲沃人博學宏才名傾一時宏治間貢任襄陽

通判曾征苗之役督餉有功除登州署甯海文登兩邑多惠政以疾歸非公不謁值有大事邑大夫嘗造廬請焉孫時隆舉人時古進士

周道字汝履翼城人正德丁卯舉人授延安府推官復補揚州有犯大辟者託要津囑之道不從舉正其罪忤要津意遷鞏昌府通判督甘肅草場裁抑豪貴霸占者歲省官銀三萬兩聲稱愈著寮案多疾之以艱歸絕口不言仕進

許翔鳳洪洞人正德辛未進士授上蔡知縣時承流賊蹂踐後安樂撫恤旬月如初升監察御史巡按甘肅又按兩淮及畿內抑強禦繩官邪臺中有老成之譽遷陝西參議上疏乞休居鄉忠信醇厚雅好山水每藻詠自樂其志

陳維藩吉州人正德戊辰進士少卓越穎敏弱寇登第授刑

部主事折獄明允晉郎中督糧薊鎮時武廟東巡錢甯竊威權索賄少不遂中以危法維藩獨屹立侃侃不少貶甯假他事逮繫謫貴州婺川知縣有水南集行于世

胡鑄字孔成翼城人正德癸酉舉人授開封府通判清操自守苞苴不入雖職司糧儲不爲督促而人爭以時輸天旱禱雨卽應衆稱爲至誠所感後遷鄜州知州致政歸

丁汝謙字子益吉州人正德甲戌進士初官太常寺博士擢禮科給事中世廟入繼議尊與獻禮據經史力諍爲大禮貴人所忌謫曲周縣縣丞遷永平府推官終四川安縣道所至皆有廉能聲

喬遷洪洞人正德丙子舉人授豐潤縣知縣調宛平厯戶部主事鄭府長史少英邁厯官敏練多善政條陳切中時務當

道器重兩縣民甚德之署部以清慎名時被忌左遷王官土
論深惜

趙進翼城人正德丙子舉人岐山知縣均差役懲豪民調祥
符丁丙艱服闋補博野知縣升沂州知州在任五年致仕孝
友謙牧輿論推重

劉穆臨汾人正德丁丑進士翰林院庶吉士志行端謹詩文
工麗奉命河南祭河不受餽遺歷官太常寺少卿

鄭良相洪洞人以例貢官成都縣主簿惠愛有祖風守官不
滿德潔已無苟取時稱金玉君子卒於官邸當道哀其賢明
賻歸櫬

李大嘉字子美曲沃人隆慶戊辰進士清苑知縣裁夫馬招
逃亡不干權貴升戶部主事權稅計關晉郎中督儲陝右出

納明允卒於官

曹永年太平人隆慶庚午舉人萬厯中知甯州以廉謹著考績入都宴天下清官於禮部永年與焉

李爾襄陵人剛直孝友有古人風以隆慶三年貢司訓新蔡視躬範士一軌於道當道重之有取子嚴一介道義洽諸生之褒尋升沔縣知縣閱三年廉惠聲洽漢南而專城保障之功沔人永久賴之

仇時隆字伯邁曲沃人舉萬厯己卯鄉試明年中會試乙榜十上公車不第授胙城知縣縣役苦不均時隆分鍵二總胥各給紙筆令疏其肥瘠取相符者類之編審豪家率借搢紳爲闕白姑高其則未幾刺紛來則略減以示寬役遂平尤加意學校有知人鑑浚邑期年以足疾歸行李蕭然邑人碑其

治行於道周以志不忘子文茲天啟元年恩貢四年舉人工
書法文名藉甚未仕卒

王三錫翼城人萬曆戊子舉人任成縣知縣嚴以持已寬以
御下農桑之暇卽選民間俊秀令就師讀書恆親詣社學閱
試給紙筆以示勸勵七年升乾州知州後任滄州有一清如
水之稱同知甯夏靖寇紀功事母至孝行誼端方邑人稱之
蘇州俊字虞廷曲沃人萬曆辛卯舉人任許州教諭誨士子
以實行爲本一時名流皆出其門升南召知縣調南鄭時常
板子張義脫伍寇漢中州俊單騎請兵隨奏蕩平升本府同
知以守正不阿致仕歸惟圖書數卷而已父沒廬墓三年
張國光字賓吾曲沃人萬曆辛卯舉人授屏山知縣均賦役
清驛遞革役丈田殲積年之寇佐餉運之窮卓著成績下艱

補夏邑亦有聲升戶部主事轉員外郎

傅永康字大微汾西人萬厯貢授汝甯通判署府篆攝新蔡除遼東管糧出納詳明撫院方一藻疏題卓異擢河州知州治河三年一無所取或勸善事上官承康曰溫公之對人情獻之告天是吾師也致仕歸士庶扳轅泣送

郭衛宸字葵一太平人崇禎辛未進士授四川嘉定知州革除火耗有命案卽刻親驗誠格水火威清奸盜邊境以甯疏錢局創義倉立課社民建生祠十餘所升戶部員外以親老未任更革後凡事關地方者力爲之如揭報司農冀求減賦具呈銓部懇求賢令守城救荒合邑被德疏薦不起年七十

卒

以上平陽府

祝春蒲州人學行冠一時有偉望明初以儒士舉爲通政司

參議累擢詹事府少詹事卒於官太祖惜之賜卹特厚

蔡瑄榮河人洪武開國初以學行貢於廷授儀禮司序班有賢聲累擢通政使司通政使糾正乖謬百僚肅然尋以病乞還卒於道訃聞太祖悼惜製文以祭復其家三年

陳榮祖臨晉人洪武庚午舉人歷富平洛南商縣濟源知縣守正不阿爲權貴所構幾危以治行得免志稱其居官有留犢之遺風處鄉踵息訟之懿範其在商縣當兵火之餘縣治俱廢爲政有方吏民畏服荆建祠宇壇壝百廢具興

薛魯蒲州人建文己卯舉人官工科給事中嘗三奉命使占城交趾儀觀雄偉議論慷慨所至輒傾其座人後卒於交趾勅賜歸葬

謝廷桂蒲州人舉景泰癸酉鄉試第一入都曹石輩爭館之

廷桂拒曰君危如朝露欲挽我耶未幾果敗成化初同知常州廉明果斷治行課最升河間知府未任以事憤激辨章凡十餘上違制被謫宏治末放歸田里次子身宏治己酉舉人守甯羌民爲構祠西平巨寇東治河決宸濠之亂從容安輯兩賜璽書褒之

景佐蒲州人宏治庚戌進士授東安知縣有惠政遷都察院經歷因忤逆瑾矯詔下錦衣衛獄尋謫開州判官累升河南參政所至執法吏民莫犯旣歸杜門養重尋卒

劉濬蒲州人正德中以貢授平涼知縣愷悌作士惠和撫民居官居鄉清白一致子成德進士爲風力御史歷參議富著作成德從子一正一中俱進士一正歷官陝西參議剛果不阿一中授澄縣知縣學識精邃所著有大易圖

荆琨字汝石猗氏人嘉靖間以貢授清水訓導歷武功教諭西甯教授琨性端慤恬淡家居謝交游教子孫以藝行純修嘗曰承家不在名位而在不失其身持身不在文譽而在不愧於心時稱名言及卒門無雜帛之賓有王太尉風陝志稱其司訓時捐俸補葺廟宮集諸生於官舍講習天旱出粟賑貧五年如一日

周有光榮河人隆慶辛未進士歷陝西參議清理糧儲冒濫者修邊牆二百餘里邊境賴以安俺荅引弦數萬從赤水口窺甯夏嚴兵以討誘致主謀者切責之諭以禍福懾服去時有忌其才者陰媒孽之賴侍御韓國貞等連章得白事繼母極孝外母趙從母宋皆孀婦也無所歸皆迎養終其身而保全羅開府之嗣撫字張隱士之孤士論尤高之

張嘉賓號兩山猗氏人少雋穎習舉子業累科不第入上舍爲福山丞雅不樂敲扑棄官歸以絃歌自娛徧歷境內名勝有馬生者官罷不能歸嘉賓養之數年卒資給而遣之

薛侃榮河人性貞介幼聰敏從事刀筆公辯勤勵法律精明以例應銓正德中除河內縣尉清苦絕儉一塵不染上下咸服其才守列薦剡升知曹縣恩不病威慈不礙法滕糧移曹曹苦累力請開豁曹民懼呼稱慶擺保定通判憂歸復除平涼通判尋升隴州知州卒於官歷宦途二十餘年蔬食布衣無異寒素而實心經畫持法嚴毅確乎不少寬假士君子雅敬之

任彬蒲州人嘉靖壬午舉人授武強教諭升平谷知縣守城禦寇有功升知州轉兵備副使致仕平谷有生祠子諫辰萬

山西通志卷一百四十一
歷辛卯舉人東昌府同知能紹父業

閻養醇字復我猗氏人帶經負耒力學不輟四壁蕭然處之晏如年幾三十始室天啟辛酉魁於鄉仍甘貧株守人不知其爲孝廉也任榆次教諭甫三月憂歸哀毀成疾卒

荆可棟猗氏人崇禎戊辰進士由行人擢南給事中嘗疏請免本縣逃故丁額及平陽加派銀二千有奇邑人立碑紀德又輸金修建西城月門立巡舖建文昌閣築重城一週凡火器兵備一一修飭城守以完以上蒲州府

任毅長子人洪武二十七年以貢署蘇州知府歷重慶開赴二府入爲工部左侍郎謫本部主事遷員外郎中致仕歸養風姿俊偉學問贍博三守大郡俱著偉績及入爲卿貳聲望益峻降謫後日夜勤其職告歸優游林泉識者尤推服焉

王士宏潞州人洪武庚午舉人知甯海縣時方氏初平籍
台明三郡兵黠者竄平人其中士宏曰奈何誣民爲兵抗疏
言其狀辭甚切事得寢尋遷南雄府通判卒於官

曹鶴字九皋潞州人元總管璣子刑部郎中伯堅後洪武間
舉賢員方正拜右副都御史轉左晉左都御史以才品爲時
重弟九齡亦以薦官四輔至武英殿大學士

楊能壺關人姿儀瓌秀有才識天順己卯舉人授東昌府同
知在任廉明譽徹上下時有妖言連逮千餘人皆抵死能力
辯得釋升本府知府以幹濟稱子奇

楊奇字秀夫成化辛丑進士授戶部主事宏治己元上裕國
安民疏極言足食足兵之法在端本澄源進陝西司郎中時
甘肅弗靖奇奉敕整督軍餉將行上疏言備邊七事上嘉納

之尋升嘉興知府改夔州有惠政

王馴襄垣人成化中以例貢官渭南縣丞果敢有才力渭南爲孔道諸達官貴人往來如織其僕役恃勢凌灼馴抗言與爭據律例折之諸人咸相戒無犯此疆項吏嘗兼攝驛務傳遞者胥斂迹驛傳爲之稍蘇

栗銘字警之潞州人宏治己未進士知信陽丹徒二縣剛正有風力不屈權勢徵拜給事中以宗親改南直徐州知州張美長子人嘉靖戊子舉人授鎮原知縣值歲歉殫力賑濟多所全活再補公安條議興革四事會邑災拜禱大雨滅火調盡縣以病歸所至有去後思

王濟美平順人嘉靖間以貢任金鄉縣丞升德州判官卒於任朱侍郎疏稱其居家孝友歷任清勤首修河工有效出納

錢糧無侵云云祀金鄉名宦

王鵬長子人嘉靖中以貢任祁縣訓導升無極教諭推誠訓誨諸生立碑識之再升湖州教授湖人與安定並祀有王蘇湖之稱

栗永馨字子明長治人萬曆丙子舉人幼孤事母孝舉於鄉授南通州知州潔已愛民正直不阿時織造官監勢張甚永馨抗禮不屈遂歸里與唐珪數人詩文唱和

王基洪襄垣人萬曆辛丑進士選翰林庶吉士授監察御史出按陝西抗疏列稅璫罪狀得旨撤回再按浙江值水旱民饑又疏請易折色並得賑銀十萬出爲應天督學校士稱公明會淮撫被論以持正議與同官忤引疾歸

吉人字國貞長治人性至孝萬曆甲辰進士授獲鹿知縣選

江西道御史出按甘肅兼理學政剔弊興學有風節升東昌副使時漕涸舟膠疏濬牽輓凡兩閱月萬艘抵通

李一爵昱裔孫萬厯丙午舉人知狄道涑水胥有惠政升通州知州通爲進賦劇郡蠹胥盤據出入蒙混三載五易其守一爵嚴爲清覈諸事節省年餘賦課悉完又代徵壓次一千五百有奇蠹胥銜之中以匿揭郡人叩闕昭雪以原官補用不赴

程尙勤字必勵長治人博學有才思嘗預纂修郡志以明經授平陽訓導升醴泉知縣保定府通判分署易州軍士有脫巾者尙勤單騎往諭歸伍後致仕祀醴泉名宦

劉大武襄垣人自許州判升靈臺知縣性明敏發奸擣伏人不敢欺破羅哩賊於橫渠盜賊屏息夜聞績紡讀書者晨卽

賞勞課士勵俗著有循聲

以上潞安府

曹輿介休人永樂辛卯進士授行人讀書過目不忘博通諸史名重當時以病歸止騎一驢行李蕭然

武允介休人永樂丁酉舉人通明五經博覽羣籍恆以啟迪後進爲心初授陝西甯遠教諭復除直隸盧龍縣學所至有聲尋乞致仕鄉後學翕然宗之

胡福介休人湖廣武定衛軍士永樂間從本衛指揮征南生擒麗王升本衛指揮

柴莊汾州人監生宣德末知金縣廉正愛民秩滿百姓保留增俸復知縣事

董瑾字文圭介休人正統間貢任陝西甘州中護衛經歷剛直勤廉秉公執法時有貴宦滕蛟妹以不孝詞投瑾瑾不少

恕御史李受囑轉囑於瑾瑾不聽卒置之法

任義平遙人景泰庚午舉人孝思純篤執喪廬墓三年知真甯鞏二縣操持端潔教民勤稼煦之如子民立遺愛碑

李穎平遙人天順己卯舉人授兗州府通判清介自持祈禱輒應民作清泉詩以歌之祭酒王雲鳳亦服其廉謂有太古之風

武賢孝義人貢士有孝行生能盡事沒能盡恩天順間任元氏知縣政務簡靖有訟者反覆以理喻之不加刑民競勸以訟爲戒園扉有宿草焉調興平縣老弱扳轅不忍別其治興平亦如元氏

溫廉介休人成化戊子舉人濟南府同知招撫流移奏除民害九年升雲南尋甸知州復除澂江知府時土賊猖獗殲其

巨魁餘悉解散以禮匡俗政聲益著激江素無城郭並公署
皆創建焉

周儀孝義人成化辛卯舉人正德中任鄆縣教諭與諸生約
雞鳴起勤誦書史怠佚者有罰縣城隍廟值會期聲伎繁豔
觀者塞途諸生無一敢延並者秩滿升保甯府教授篤於訓
迪一如鄆縣時事

馬驥介休人成化甲午舉人貌偉學充善迪後進遠邇來學
者多登科第初任寶坻知縣朝司民事暮訓青衿臨事果斷
不阿貴幸邑多皇莊草魚等廠中貴權幸時騷擾爲害驥特
奏準兵部出榜通行禁革一時頌聲溢於中外

任頁才平遙人成化丁未進士初授江陰知縣升高郵知州
歷任清介性至孝母病嘗糞父病願以身代至教誨民人媿

媿不倦賢愚皆獲其益

車梁石州人成化時爲御史十五年條列時政中言東廠錦衣衛所獲盜先嚴刑具成案然後送法司法司不敢平反請自今徑送法司毋先刑訊章下未報主東廠者言梁從父郎中寔先以罪爲東廠所發挾私妄言遂下詔獄給事御史論救乃獲釋遷漢陽知府卒

劉端甯鄉人舉人成化間西安府同知明曉水利委心民事修治渠堰人被其澤旣去任民恆追思之

宋銳臨縣人例貢知洋縣時藍郡警擾羽檄傍午外給軍餉內撫民心邑賴以安

田籽汾陽人宏治己酉舉人長清知縣居官鯁直一介不妄取事親孝養誠至及親沒廬於墓所哀毀骨立嘗有早霜殺

禾獨親墓禾不傷人以孝感

劉尙忠汾州人正德丁卯舉人授合水知縣邑僻事簡尙忠靜厚不擾蒞政五年晝日清閒有白鳥常集於庭升平涼通判

溫恭平遙人驍勇絕倫正德間有功任征西大元帥子孫世襲

嚴霜臨縣人正德中貢嘉靖八年知襄城縣性溫和簡約以儲蓄爲急遇雨暘祈禱如響施澤活人不受餽遺廉潔之操終始如一

高金石州人嘉靖丙戌進士歷兵科給事中有疏請止汰生員逐陶真人而於豪張孝皇親牛氏胥以法治之不少貸上聞之曰直臣直臣升山東按察司副使

王守履字存予甯鄉人檢討縉子天啟壬戌進士授許州知州州比歲不登兼徵發繹騷守履以惠和愛利爲先循聲滋起入爲戶部員外郎疏陳崔呈秀可殺四大罪中間並及陳爾翼奸狀及爾翼疏辨卽就其疏駁之復具奸黨情形愈真徵臣觸奸非妄一疏申理前說得嚴旨降調崇禎初起原官後改湖北監察御史子瑄以恩蔭候補通判

陳王道甯鄉人萬厯壬午舉人延川知縣調清澗理冤獄判決如流咸得其情四鄰控額者皆假藉以希廉斷而裨躬廉潔士專其業民樂其生循聲大起擢正定同知

王政字正之孝義人萬厯癸未進士初授宜陽知縣讞獄稱平調清苑縣裁冗費撫流亡尤不阿權貴升刑部主事督漕運清別轉輸弊資褚司徒特薦於朝居鄉亦以鯁直稱

王鳳翼甯鄉人崇禎丁丑進士授漢中推官時盜賊內訌鳳

翼設策防守增修城垣保安境內尋升刑部主事以上份州府

張綸陽城人成化辛卯舉人知陝西甘泉縣流寇為亂綸令

子率民兵晝夜守禦且請援兵寇遂遁藉以安

張黻字廷儀陽城人成化甲辰進士知靈壽縣清慎簡默不

苟言笑拜御史巡按陝西有重犯人當刑前吏畏避不敢決

黻至立決之升陝西副使卒於官箚中惟俸金六十兩憲長

各屬致賻始得歸葬

常賜沁水人領宏治己酉解額癸丑成進士任行唐知縣累

遷陝西按察司副使賜早失怙叔軋撫育教誨之卒能顯達

子倫別有傳

王玪字邦器陽城人宏治己未進士初授刑部主事繼補戶

部屢奉監督倉差能剔弊尙書韓忠定以廉靜稱之遷刑部
員外郎升山東司郎中時逆瑾尙嚴刻玠持平恕爲瑾所
惡思中之無可乘未幾遷陝西僉事川陝總督洪問其賢取
軍前贊畫瑾誅調河南分巡汝甯道刺賊劉六等歸上蔡逼
汝城玠誓死守已而賊攻城遭挫劫奔潰衆將慶功玠以賊
首尙在不可乃密奏賊可平狀朝命撲勦有賊黨汝人趙秀
母繫獄玠出之秀感激思効適賊首趙璠與劉六等會兵秀
急走報玠玠率部下官兵盡擒之解送軍門紀功官吳主榮
索賄不應人皆優敘玠止賞綵帛銀牌而已歷兵備薊州及
山東參政俱有績命勘開原執貢使之誣莊鎮俱獲罪人多
忌之遂解綬歸卒於家

郜相字立之澤州人正德丁卯舉人朝邑知縣廉謹自持政

平訟理役均盜息特建忠臣高翔劉烈女祠號知大體

王叔陵字之義陽城人嘉靖乙丑進士授嵩縣知縣嵩故有

鑛穴多巨盜叔陵至多方緝捕又廉其渠魁假以把總名目

勒令擒勦一時肅清興學勸農善政種種人肖像祀焉播評

事轉工部主事歷官湖廣參政所至有聲

以上澤州府

羅義建文時鎮魯衛戍卒也靖難師起義詣闕上書請敦親

睦之義又走北平上書忤燕王旨下獄及卽位得前所上書

赦之授兵科給事中尋遷湖廣參議

齊政大同人永樂丁酉舉人授鴻臚寺序班改鳴贊秩滿遷

主簿仍掌鳴贊事擢寺丞歷右少卿晉正卿疏請致仕優詔

不許又四年復疏請許歸展墓畢復回寺理事年七十七始

予告歸政貌魁梧音吐如洪鐘侍殿陛進退皆有常度卒遺

官論祭卹與瀾厚

鄭頤應州人永樂中貢生由知縣擢監察御史出按京畿帝北征抗疏力爭後復屢疏言事朝右咸側目遂拂衣歸

李文煥大同人永樂中由太學生累官吳堡縣知縣廉敏有爲初任神木典史禁亂誅暴以幹濟稱至是爲親民官生聚教訓日久愈力民皆親而愛之論者推爲通材

吳翔大同人正統初任代王府教授以數諫被謫都御史富薦其才起知曹縣有惠政

劉文字宗華大同人以鄉貢選習譯字舉正統元年進士授中書舍人仍譯字十四年扈從北征還陳邊務數事景皇帝召入便殿面問之尋命提督四譯館丁母憂詔奪情任事升吏部郎中天順初以迎駕功升爲右通政成化九年命偕都

督李文撫安西番三年後歸乞休致至家卒

劉道懷仁人景泰丙子舉鄉試第一天順甲申成進士選翰林院庶吉士改吏部主事歷本部員外郎中終河南布政使道文章政事卓有可觀解組後閉門養高蕭然不與世接白鷺字孟禽成化丁未進士觀政工部虞衡司督修代王墓於大同費省役速擢御史舉廢滯抑豪橫爲忌者所中謫曲周丞稍遷章邱令丁父憂歸卒

撤俊大同人貢生成化中知陝西醴泉縣增築外城建立場市歷九載剛方如一

翟廷楠字棟叔渾源人隆慶辛未進士授涇陽知縣賊訟滋繁吏緣爲奸懲宿蠹繩豪右吏畏民懷捐俸修葺學宮歲祲申請蠲賑移南大理評事有冤獄衆避不爲理亟爲平反又

有坐法當刑者行金祈免叱出之寘於法異已者騰謗遂罷歸

楊茂春大同人驍勇熟韜略萬厯中任指揮僉事累官太原總兵天啟初移鎮薊門敵望風警伏崇禎初以宿將召對便殿詢制禦方略特命鎮守大同邊人無烽火驚後晉秩都督同知賜蟒以上大同府

孟周朔州人成化己酉舉人授閔鄉知縣時有疑獄閉關思過會蛛沿纓上命緝朱英果獲升衛州府同知

錢萬選右玉人崇禎初武進士累官都督僉事鎮守固原文雅有古儒將風能不動聲色定大變時餉訕不至有黠者謀劫眾掠州庫並諸富室萬選密伺之知已帳前卒亦預其間夜坐密室中秉兩燭親兵左右列遠呼卒至厲聲問之卒愕

然吐實因悉得首謀者名姓次早胥笞殺之亂得不起主餉者懼累已以縱軍誣之禡其職中外惋惜

孫日嚴字敬倩朔州人七歲失怙事母唐以孝聞舉萬厯甲午鄉試令偃師守霸州所至有清白名己未大計以勁直失監司意左遷平定州判時軍興旁午日嚴主餉事以勞瘁卒於官

以上朔平府

楊祕遼州人永樂間貢除知徐州練達老成撫綏有法在任二十餘年以善政稱勅賜食河南參政俸

李隆字世昌榆社人成化丁未進士授洛陽知縣剛毅廉勤一塵不染人不敢干以私丁艱補內黃政績一如洛陽升鈞州知州以最擢崇甯知府勞勤致疾未任卒

陳桂和順人宏治辛酉舉人事繼母至孝任蘭陽知縣時流

賊作亂修城守衛士民恃以無恐外艱歸撫按保留

趙鶴遼州人正德戊辰進士任御史升僉事居官清慎聲名卓然後家居二十年慎取與有雅操士論翕服

楊永祐遼州人正德庚午舉人任山陽教諭學約森嚴勤於誨導中丁丑進士授刑部主事嘉靖初抗章論事復內豎侵

占民田若干頃卒於官入山陽名宦

以上遼州

崔鉅沁源人景泰癸酉舉人任秦州知州涖官清白守正不阿當道忌之免歸貧如洗

劉潔沁源人成化中貢知中部縣慈仁有大略拔滯補偏不苛取予建修廟學衙署廣積倉儲遇凶年活民甚眾

徐朝宗沁源人歲貢任南宮訓導德性謙恭儀容修整居鄉不履城市不謁有司嘉靖三十二年兵科給事中張廷槐請

本縣令悉朝宗素行深敬焉

魏鼂字景能武鄉人由貢士授獻縣縣丞薦剡九次檄旌十
九次升香河知縣解組歸後補府谷縣吏畏民懷治行爲延
廊第一後以強項歸里

郭衛民字莘野沁州人孝友敦行內外無間妻王氏病廢終
身調護不畜妾勝里中嘉其德義以貢授平度州訓導遷屯
留教諭以疾辭道經屯留諸生郊迎請就職謝曰一命固當
勉就但身老矣兼以疾恐不能朝夕訓課負多士以負朝廷
也遂歸踰年卒士論推重

魏權中武鄉人崇禎間貢士知陝西郿縣長才大略果於任
事時流寇猖獗隨宜守禦斬獲頗衆升西安同知

以上
沁州

和文字希文平定人邃於學行誼甚高洪武四年舉通經儒

山西通志卷一百四十八 仕宦錄四
士除刑部郎中存歷太子贊善致仕歸宴賞有加命有司護
送並令諸王大臣賦詩祖餞當世榮之

王中立平定人洪武四年以通經儒士除禮部員外郎升刑
部侍郎轉中書禮部侍郎山西等處行中書省參政

焦勝字復禮其先平定人徙居樂平其母夢吞月入懷遂生
勝聰明特達才器過人洪武丁未進士廷試一甲三名授翰
林院編修改授岐山學諭永樂二年升浙江道御史卒於官
吳昭孟人幼穎異喜博覽於五經諸史皆能通曉大義洪武
間授中書省郎中以廉敏著後遷福建左布政使會天變求
直言抗疏條陳國事凱切明晰朝廷下詔褒之

吳允孟人布政昭從弟也少有卓識通古今事變元季託迹
緇流放浪山水間爲高皇帝所知陝西布政使缺吏部以閩

帝曰某寺僧允可用也蒞任某稱職改山東布政使副使張孟兼負其材以允舊爲僧頗輕之允上書言狀請歸田里避賢者路高皇帝罪孟兼而慰留允後遂占籍山東

劉整孟人永樂辛丑進士知安定不恃苛刻而民胥治升華州知州興利除害州人爲立生祠擢山東參議濬漕河有功賜表裏服色轉參政子時敏中城兵馬時勉平涼府經歷

閻亨字淑泰孟人祖潭以進士授正定府知府父舉賢良任四川崇甯知縣亨博通經史宣德間以貢授南康府經歷清苦自甘歸橐惟書數卷子文輔文德並舉於鄉

董旻樂平人成化時爲給事中早朝偕同官劾學士商輅等疏呈御前上不悅曰大臣進退有體旻等敢不循舊章亂朝儀耶旻等復合詞攻而詆禮部尙書姚夔尤甚遂下獄給事

中毛宏疏救輅亦請寬乃杖二十復其官晉吏科都給事中
爲吏所訐逮詔獄謫石曰知縣宏治時終四川參議

岳崇壽陽人成化乙酉舉人以母老不急仕進宏治間授河
間同知操履清嚴權要懾伏而事母晨昏惟謹母嘗撰疾崇
親調湯藥扶持撫問不假婢僕閭里傳以爲範

吳璉平定人成化丙午舉人授平涼府同知行縣至華亭適
有警民不知兵箠堞復頽圯減洵謀遁璉令曰敢私下城
者斬衆乃止堅壁清野晝夜徒行巡視數日敵解去城得無
事民咸頌之曰吳公生我也

和鵬平定人成化丁未進士授慈谿知縣歷官僉事廉潔自
持終身無餘資惟守先人舊廬時稱清白

閩邦重壽陽人宏治年間舉人授浙江鹽運司判廉慎自勵

擢兩淮運副武宗南狩中官恣縱搢紳皆危邦重獨毅然不屈抵家以所得餘俸悉惠族屬

李應奎平定人正德庚午舉人授高陵教諭歷任鞏昌廬州二府教授伊晉兩藩紀善右長史高陵呂柟稱之曰孝友之行可通神明篤信之學不愧往昔有過日成誦之資食茶茹苦之節振頽激頑之才先人後已之行弟應庚同知應箕知縣應斗知州子念歸德知府愈鳳陽知府懇南召知縣

李濟壽陽人正德庚午舉人授太倉訓導再補任邱敦禮重義教士以身先之乙卯中州聘典鄉闈陟國子學正出爲鳳翔府通判與廢補帶捕賊滌奸以老歸百姓泣送行李蕭然歷官二十餘年寒素如未仕時

賈侃壽陽人正德癸酉舉人授安陽知縣德化大耆不畏權

要請託不行改宜陽益勵清節邑多礦賊為害以計捕平母老乞歸臨終大書忠君孝親隆師睦族八字

李榮平定人萬曆甲午舉人知陝西鳳翔縣有惠政邑人有掘地得金者或訐之榮曰彼自得金何與爾事居官數載人

稱其廉升南京兵部主事

以上平定州

張蕙忻州人成化丙戌進士授句容知縣擢御史甚有風望按山東監試持法公嚴時稱得士升浙江副使以廉直忤上

官歸

張偉定襄人中宏治戊午鄉試授山東濟南府推官嘗祝長蘆鹽卻商例千餘金監兌德州卻羨金二千餘兩修漕河刻期成功流賊經濟南設捍衛築城獲保無事升順天府通判九載考績升松江府同知卻歲例數千金民歌之曰使君如

水清部使者揚之曰清苦類寒酸卒於官

以上忻州

賈忠崱縣人正統甲子舉人知滄州有異政設法救荒民無失所九年滿民詣闕請留更任九年累遷苑馬寺卿

趙文博代州人舉進士爲御史天順時同張鵬楊瑄等劾石亨曹吉祥下獄擬遣戍尋貶涪化知縣有善政憲宗初擢衛輝知府特賜封誥累遷右副都御史巡撫河南卒

崔元代州人尙憲宗女永康公主世宗入繼以迎立功封京山侯給誥券諭禮部曰永康初年太宗入繼大統駙馬都尉王甯以劾戴功進封永春侯非無故事也已坐張延齡事下詔獄尋釋元好交文士有譽於時寵幸優渥勳臣戚畹莫敢望焉卒贈左柱國太傅兼太子太傅諡榮恭

張檄代州人成化癸卯舉人歷官陝西副使環慶兵備識明

而量宏於兵食計尤練又強記過人凡接於目者終其身不
忘在慶三年人以安靜稱之

賀瓚 崞縣人成化丙午舉人任三原訓導立心清慎造士有
方升南京國子監助教弟璠字寶之由舉人任長安知縣廉
靜寡慾改知高陵曰柑有雀飲硯池犬驚樂韻之句以事忤
逆瑾免官瑾誅起鄠縣多惠政

劉淮 字濬之崞縣人育勇力好學問宏治中以世職守保安
新城歷升宣府副總兵賜飛魚一襲龍門所虜酋花當久肆
侵犯奮兵勦之捷聞進級賜金帛注中府都督僉事鎮宣府
統馭得宜地方甯謐充團營東官廳左參將武宗幸邊邊將
爭起取寵淮獨謙退武宗稱爲劉夫子嘉靖間鎮守關陝終
其任虜無侵暴注左軍都督僉事奉勅鎮守遼東招來夷落

振肅軍威以年老辭歸卒於家

王啟崢縣人成化間貢授房山知縣性剛方不避權倖升判
西安督糧祁縣既有期不果行太守嚴問其故故曰吾心動
恐有親故踰日母訃至巡撫熊嘉其孝感贈以金後補汝甯
通判政尚寬簡汝民思焉

吳樸字叔溫代州人舉嘉靖辛卯鄉試選大城知縣以最遷
知德州均役緝盜甚有能聲內轉戶部郎中遭父憂歸遂不
復出喜施予尚風節方仇鸞用事時諸部郎白事惟謹璞獨
抗禮不爲屈郡倖賀某以負官緝繫獄將鬻其妾爲代償之
而宰大城日值大水力請蠲賑尤多惠政民立祠以祀云
安嘉善字體亨代州人嘉靖乙丑進士由部郎出守西安歲
饑寬徭役禁科擾出粟振濟存活萬餘人遷山東副使轉河

南參政進按察使春陵當吳楚之交地出鑛奸民驚利聚爲盜設方招撫未期而流亡復業盜遂戢擢湖廣布政使旋卒張崇榮字子寵代州人萬厯壬午舉於鄉授魯山知縣下車卽興修廟學聚諸生講誦分俸濟其貧者歲旱徒跣白責甘雨隨澍期年政教大行遭憂去後厯宰朝城平陰並有政聲張崇禮字和節代州人萬厯己丑以二甲一名進士登第累官至南京通政使性剛直逆璫用事大江以南爭起生祠喟然曰此何時尙可仕乎卽乞病歸

張鳳翼代州人萬厯癸丑進士授戶部主事厯廣甯兵備副使憂歸天啟初起右參政飭遵化兵備三年擢遼東巡撫請專守關門與樞輔孫承宗異議內艱歸六年秋起巡撫保定明年九月以三王之藩加兵部右侍郎總督薊遼崇禎元年

謝病去三年起總督薊遼保定軍務與諸將馬世龍等協謀復四城進太子少保兵部尙書世蔭錦衣指揮僉事鳳翼以西協單弼疏陳增良將宿重兵備火器預軍儲遠哨探數事從之已復謝病去久之召爲兵部尙書以宣大兵寡乞兩鎮各增募萬人一人食二餉分營訓練從之七年以恢復功加太子太保請命三邊總督兼督河南山西湖廣軍務賊將南犯請移江北巡撫楊一清鎮鳳翔溫體仁不聽八年鳳翔陷戴罪視事請令朱大典鎮鳳翔推盧象昇爲總理又言賊在關內者屬總督在關外者屬總理備賊盡出關則總督合勦於豫盡入關則總理合勦於秦所慮者賊號三四十萬更番迭出勢重而力合我零星四應勢寡而力分賊所至因糧於人皆宿飽我所至樵蘇後爨動輒呼庚賊馬多行疾一日而

十舍可至我步多行緩三日而重滿難馳眾寡饑飽勞逸之勢相懸如此賊何日平乞嚴飭兩督臣以一二萬人爲一軍俾前茅後勁中權聯絡相貫然後可制賊而不爲賊制上稱善命速行之鳳翼自請督師討賊不允九年請勅河南鄖陽陝西三巡撫各督將吏扼防四川湖廣兩巡撫移師援剿而總理二臣以大軍入山蹙之且嚴遏米商通販賊可盡上以爲然七月賜上方劍盡督諸鎮勤王兵治軍書不休九月朔卒奪官十一年論前勦寇功詔敘復自庚辰後易中樞十四人皆不久獲罪鳳翼獨居位五載言官屢劾皆不聽

以上代州

李文翰字內英河曲人正德丁卯舉人授儀真知縣政尙平易嘗梓農書教民樹穡尤崇士類己卯冬武宗南巡供役浩繁悉力經理不辭勞瘁歷任六年擢知商州又六載升河間

府同知律身莊肅與人和易

張綬保德人正德間貢居鄉恂恂奉親惟謹力學篤行人無
間言始丁內艱不飲酒茹葷比葬廬墓三年入太學人望從
之往本州與河曲歲辦額設六爲民病綬齋心屬稿祈存留
本處備官軍歲支詔可其奏後授山東齊東縣丞以上保
德州
李輅安邑人永樂辛丑進士累官山西右布政使廉介恭謹
里閭信服學士曾鶴齡嘗稱其爲政清而溫惠而直廉而不
激寬而不縱時人以爲實錄云

裴祥夏縣人永樂間貢任工科給事中初天下驛傳有馬而
無驢祥奏爲馬數不足用增則傷財病民添設以驢價廉而
財省亦足給用文皇可其奏命祥巡歷酌處後以言事忤旨
上方在疾中調同安知縣疾愈思之取復諫職而祥卒矣

張琦安邑人正統戊午舉人授甯陽教諭選高陵知縣卒于官性剛正面貌蒼古時人以鐵臉稱之居官廉節恆以孝弟教民沒之日囊無餘資丞欲以庫羨銀贈琦不受取管鑰符籍付丞而卒

滕浩解州人景泰庚午舉人知泗州剛介輕財不附勢要有指揮通巡倉御史虛出通關浩皆劾之

郭璿字廷圭夏縣人景泰庚午舉人陝西臨洮府同知升江西南康知府蒞官守身一以謙抑長厚爲主初郡多虎害璿反躬自責禱於城隍翌日虎渡江自死廟下人以爲異

馬忱夏縣人天順壬午舉人會試中乙榜任富平清澗東平三學教諭轉武定州判官在三學視諸生如子弟貧者供其飲食整廡拔秀就造多方平生勇於爲義親屬貧不能辦婚

葬者輒資給之嘗題泰山試心石曰天君純粹本無侵眾欲
交攻乃獸禽若肯嘗存天理在何勞石上試人心後以子貴
封工科給事中

張璉安邑人天順甲申進士官御史按蜀及北畿風采凜然
將抵家望里門而步鄉黨重之以忤權貴出爲郡守子棻舉
人官僉事蔓舉人官知府范解元官同知俱有政績芮進士
王文解州人成化乙酉舉人幼孤事母以孝聞性沈默詩文
疎古自成一家人歷任武功汲縣教諭卓立師模人材多所成
就雖盛暑必衣冠非公事不干謁致仕杜門不出州守重之
常臨訪焉

張璞字中善夏縣人宏治十五年進士由歸安知縣召拜御
史正德八年出按雲南鎮守中官梁裕貪橫璞裁抑之爲所

誣逮赴詔獄卒世宗初贈太僕少卿賜祭葬

邢鶴安邑人正德甲戌進士歷官清慎不阿嘉靖間青羊山盜起勢甚猖獗廷議擢鶴兵備特授節鉞鶴相機搗穴斬數千級御賜金幣褒異及卒上哀惻不已

趙克己夏縣人天性孝友親疾百日不解帶居喪盡禮正德間以貢授靈臺縣訓導諸生有婚喪不給者分俸助之時邊警甚急令逸去撫按檄署印旬日措糧萬餘石當道勞之改鄜州學值大饑守巡擇委賑濟全括甚衆

李瑛字聰甫解州人隆慶戊辰進士孝友性成既仕與弟珊同居終身一無所私弟卒撫其二子無異已出官彰德知府與利除害郡人爲立生祠後官陝西參政時西郵徵兵關南人心洶洶瑛力爲鎮定一方倚爲長城及居鄉溫恭長厚州

人稱德門焉

廖永量夏縣人隆慶間貢南鄭主簿升清澗丞署褒城沔縣事所至綽有聲望吏民懷之居家日親書史摘其要者各鈔輯成編

司馬祉夏縣人溫公十六世孫與叔晰自南歸夏同登癸酉舉人晰舉解元祉聯捷甲戌進士授刑部主事歷官陝西行太僕寺少卿居鄉教授生徒邑文風爲之一變

任裕統芮城人天啟辛酉舉人初署閩鄉教諭有畫策保城之功人爲刻石頌德升國子監學錄歷司務南刑部主事郎中出爲南康知府任刑曹時力釋張名士疑獄南部咸服其識至南康重修書院作人賑饑一郡爲之尸祝

孫維藩解州人崇禎間貢任長安教諭介直不阿會宗生與

饑生沈孔明競貢宗暮夜以黃金百饋維藩欲為之地維藩

拒之一時士人咸欽服云以上解州

梁博字宏濟稷山人宏治己酉舉人陝西延川教諭博學洽

聞見義勇為時廼安守安陽崔公升重其才令署郡學道其

子銑受業焉外艱歸諸生哭別皆失聲服闋升南京國子監

學正三載考績升慶府長史屢乞歸養王懇留之丁內艱後

安化叛逆瑾矯旨罰贖米四百石人謂以半賂瑾則免溥竟

輸米服闋補秦府長史

張環字瑤夫絳縣人宏治癸丑進士授棗強知縣升階州知

州資性剛方好學不輟建一菴自題曰菜菴

范昕字晦之絳州人正德癸酉舉人初官趙州知州值世廟

幸承天駕過次日行宮災大吏將移罪散僚昕不聽慨然自

認及同知承天御史以陵監家人橫肆不法屬所鞠訊所論
報如律陵監銜之誣奏御史及所下獄戍南海所言動意氣
如常時不少變後遇赦歸萬厯中晉階四品

王時雍垣曲人正德丙子舉人授山陽知縣厯宰武城華陰
門無私謁訟不淹滯倉庫有儲緩急有備以才德兼優升微
州知州終西安同知所在政聲茂著

王价字君潘稷山人正德間歲貢授鳳翔府推官廉明果斷
獄無寃滯屬岐郡二邑土貧俗惡官者難之价署篆事以德
感化卓有異政河州民番雜居茶馬滋弊當道者擇价往易
价防奸塞賄稱物平施甫三月而馬數至十萬民歌謠如出
一口

高應聘字志尹稷山人隆慶辛未進士吳縣知縣釐弊革奸

不避權貴邑瀕太湖濟渡處多劫寇應聘更番設戍行者便
之吳民題曰高公渡范文正公義田爲豪右占幾盡應聘置
於法遂按籍而還爲警者所中謝政歸講藝課文賑饑濟貧
閭里咸推重之

張翰芳垣曲人萬厯己未進士授中書科中書舍人端方耿
介名重朝紳疏豁遠餉垣民感之

劉應科垣曲人萬厯間以貢任麟遊知縣老成正直人不敢
干以私時值甯夏之變賊勢甚厲應科登陴誓衆築壘固守
嚙指自矢日以死報國分也士民皆感泣尋賊滅以憂去頻
行惟冠蓋圖書而已補清澗除一切苛政惠愛留思

翟夢杰字興余閩喜人天啟間以將材厯都司秉性孝友母
病朝夕籲天求以身代及沒悲號柴瘠事父與繼母備極孝

養卒日悲痛感及行路赴闕請卹至于羸疾事三兄如父對
產不分爾我白首怡怡篤愛不衰任薊鎮訓練士卒同甘苦
勤撫卹軍士感悅以終養歸兵士泣涕攀留不忍舍己丑之
變焚燒公署火延其房兵中撲火相戒不犯其齋荒焚券邑
人稱世德焉子熠後中癸卯舉人任大同左雲川衛教授補
太原府學見大同名宦

以上絳州

丁珣大甯人監生正德間令石泉時值流賊猖獗人心危懼
珣身任其勞築城鑿池措置軍餉嚴爲捍禦民獲保安

張璠蒲縣人正德間任四川招討司經歷以德化蠻人聲聞
於朝擢知掖縣清苦自甘取予不苟歸時行李蕭然掖民泣
送之抵家壽幾百歲

馬中豸大甯人萬厯間授臨清判竭力漕務禁河役革水飛

部院四薦其能晉四川營山知縣營俗侈婚嫁生女多溺之
中豸裁使適中俗爲一變有摹假印者發其奸人皆悚服奉
上檄協采三殿木多獲異材山行幾二年嘗修文昌閣崇文
教立養生社救疾疫人尤稱之升雲南祿勸知州奢寇之變
直指疏改蓬州中豸力辭歸進階奉直大夫家居博覽羣書
壽七十四卒人推爲德望兼隆

以上
鳳州

劉環趙城人天順己卯舉人任汝陽知縣升光州知州廉正
律己仁厚愛人

李威靈石人天順壬午舉人授陝西會甯知縣寬仁明恕廉
正有威政理訟平不畏強禦有宦官擾害地方上疏剪除頓
消虐酷調長安興利除害吏畏民懷竭誠禱雨輒獲甘霖人
甚德之

李恂霍州人宏治己酉舉人先任寶雞縣教諭聘雲南鄉試後補申府教授升鳳翔府教授復同河南鄉試考官遷高陵縣知縣學術有本志行不羣爲楊遂菴所推重有操守有爲清慎孝友之獎

劉榮霍州人宏治己酉舉人性孝友初任陝西靜甯州訓導嚴束生儒身先條約一時文教大興楊遂菴稱其善于訓迪苦進士姚爵輩多出其門宏治壬子聘典河南鄉試升汝南府教授

裴紹芳靈石人宏治末知伏羌縣寬嚴得宜民謠曰縣令裴稟性直愷悌慈祥處處知之

李應選趙城人萬曆丁丑進士任西華知縣調韓城端方明決補清豐行取戶部員外歷郎中知淮安府裁革常例至今

祠祀焉

朱充飭霍州人忠介直亮博學能文御史劉光福諫神宗定
儲忤旨下獄飭疏救上怒發高牆斥其爵後光宗立召還

安邦霍州人天啟間貢性貞潔博通經史授滎陽縣訓導捐
俸創制學田百畝榮庠咸稱安夫子升廣陵教諭

以上
霍州

右明二百九人

又八人
附見

山西通志卷一百四十八